

蒙民伟书院 (2015-2016)

《失忆》LAST VERSION BY LAM KIN SHUN

第一场、

(灯光之下，黑夜之中，墓地之上，阿超背对观众，在舞台中央对着一座墓碑发愣。)

(与此同时，衣着鲜艳、头顶礼帽的中年男性站在舞台上的角落，对着眼前的坟墓不断点头，口中喃喃地说着「嗯，原来如此」。)

(几秒后，他带着耐人寻味的笑容，走到少年的身边)

男人：「你好，你今日黎扫墓？」

阿超：「啊？啊，无错，今日。我黎探一个朋友。」

男人：「听你既语气，好似有啲烦恼啲？」

阿超：「唉，点解人需要记忆呢？明明，呢个世界上有咁痛苦既事，如果我们可以全部忘记既话，咁会有几好呢？」

男人：「呢个世界上，令人想要忘记既事太多，但系想要留住既瞬间，就往往被人遗忘。」

阿超：「我唔明白，亦都唔想明白。」

男人：「人类既记忆系千丝万缕既存在——佢地极为脆弱，又互相牵连、交错。记忆，就好似一块脆弱既玻璃，一旦打穿左，就会出现裂痕，甚至完全崩溃。所以，喺逃避既同时，我地自身都会受到伤害。」

阿超：「你究竟讲乜野？」

男人（走向画架，把画拿起，面向观众）：「无错！就好似呢幅画上既你们咁样！」

(那幅画，正是阿超所绘的二人画像)

阿超：「嗰幅画，系我画嘅！你究竟系咩人？点解会知道我地嘅事情？」

阿超：「哦——系你！」

男人：「系我。」

阿超（扯住男人的衣领）：「点解你要玩弄人类既感情！系你害死左阿浩——害死左我既朋友！」

男人（冷哼一声，甩开少年的手，整理皱起的衣服）：「呢一切，都系你地嘅选择，与我可干？我只系一个给予方法嘅人。而且，唔通你一啲都记唔起点解佢会死？」

阿超：「我、我——」

男人：「回忆起一切啦，阿超。只有咁样，你先可以真正咁忘记。」

（听到这句话后，阿超停止了动作，僵硬在原地。抛下呆呆出神的阿超，男人走到舞台下的阶梯上坐下，饶有兴致地看着接下来台上所发生的一切）

（第一场完，灯灭）

第二场、

（达到忙碌都市的形象、气氛，群众演员手持电话，身穿意味着不同身份地位的服装，四处奔走。有一群黑衣演员同时间搬运桌椅，最后 3x3 九张桌椅在台上）

（记者从众人之中走出，就位于台前，众人定格，脸带诡异笑容）

记者（穿着正式服装，对观众，主播式语气）：「你对而家既生活满唔满意呢？你有无谗过去忘记一啲唔开心既事情呢？最近就流传左一个有趣的传言，一个名为『遗忘』的手机服务，喺坊间受到极大既关注同回响。据说，呢个服务嘅功能好实用，可以令使用者忘记一啲唔需要既记忆同不愉快既回忆，受到大众的一致好评。究竟，呢个服务系咪真系咁完美呢？而家，就等我地揭开佢神秘嘅面纱啦！」

（记者打量众人，分别走近三人）

记者：「就等我地访问一下街上既朋友啦——呢位小姐，请问你有无听讲过呢个『遗忘』服务呢？」

年轻女性（一边使用手机，按一下说一句）：「Sure! 我唔单止听讲过，更系亲身去用呢个 service! By the way, 用左呢个 service 之后，令本来唔多 happy 嘅我重新提起 energy 啦。丫！我系因乜事唔开心呢？oh! forget 左啦。总之呢件事情简直系 miracle! 所以我好 suggest 大家去用这个服务 lor!」

记者：「好，唔该晒呢位小姐热情既回答。接住落黎，等我地来访问下呢位朋友啦。」

（走近学生打扮的少年）

记者：「先生，你好！请问你有无用过『遗忘』服务呢？」

少年（说话时只有头部前后移动，书面语）：「当然有用啦而且还每天都有用呢。用了这个服务之后我简直是如虎添翼锦上添花顺心如意大吉利是！读书的压力和紧张的情绪全部忘记之后我再去做状元入港大平步青云逢二进一当上高富帅迎娶白富美走上人生颠峰成为人生赢家哈哈哈哈哈哈哈哈哈哈哈哈哈哈哈哈哈哈——」（笑声要有层次感，由低至高，发笑时身体一直仰后）

记者（拍拍少年肩头，转向老人）：「好好好！呢位先生冷静下，我们去访问下下一位朋友。你好，请问你有无用过『遗忘』服务呢？」

老人（带国语口音）：「喔，我知道，我知道！啊，这个服务啊，可以说是老林（拍胸口）既「救命恩人」啊。」

记者：「哇，咁，神，奇？究竟佢点帮助你呢？」

老人（走前两步，对观众说话既同时，记者慢慢离开）：「老林（拍心口）喺两年几前证实患上左癌症！那个时候，虽然医生话俾老林（拍心口）知老林（拍心口）未病入膏肓，又吩咐老林（拍心口）要乐观一啲，老林（拍心口）吓！边鬼个做到啊！知道自己身患重症，边个都唔可以保持乐观啦！所以，老林（拍心口）就用左这个『遗忘』服务，去将所有唔愉快的回忆都、都删除了！现在，老林（拍心口）既病情唔但只好转，生活仲系无忧无虑——嗯，只要一有唔开心既野发生，只要唔记得咪得嘍！」

(第二场完，众演员回后台，剩一众同学在台上)

第三场、

（阿超、文浩、晴晴就位，群众演员坐在后面，装作同学）

（阿超把橡皮擦抛向文浩，试图引起他的注意）

阿超（把手放在嘴边，示意压低声音）：「喂！文浩，你之前唔系话要同我创作我地两个既代表作咩？我谗到条绝世好Q阿！」

文浩（推一推眼镜，一边看书）：「嘘！阿超，而家仲上紧堂阿。有野要讲既话，就迟啲先——」

阿超（指住文浩手上的书）：「阿浩，你咪扮好学生啦。要讲呢啲，你将本书放番直再讲啦。」

文浩（站起）：「听住啦！呢本系鲁迅先生著作的《狂人日记》！先唔系咩普通既『小说』！你知唔知道我头先倒转本书系想以狂人嘅角度由外到内、再由内到外咁理解本书。（极差普通话）你懂什么阿？咳、咳。」（看到四周刺目的眼神，尴尬咳嗽，不知所措地坐下）

群众演员：「你睇！又系嗰两条傻仔阿！」

群众演员：「唉，呢两条友根本就系我地班嘅耻辱，成日话理想理想，睇黎佢地两个剩系想…」（不雅手势，表示两人是同性恋关系）」

群众演员：「你地唔可以咁讲野喎！阿超阿，佢成日都眼金金咁望住晴晴！以为自己识画啲卡通人物就想学人高攀我地既班花。我睇佢成日揸住本簿喺到望住人地画画画，都唔知入面画紧啲乜野阿！」

群众演员：「仲有个文浩。得中文好人地丁丁咁多，成日扮晒学识渊博咁嘅样，自我感觉良好都要有个限度啊！仲话要做作家喎，真系无眼睇…」

（其他群众演员附和，可以自由加小量台词。表达出对两人的不屑与轻视，对两人指指点点）

V.O.：「好啦，王文浩同学，有野倾就同我倾！中六啦你都，仲成个细蚊仔咁，郁啲就企起身，你系咪控制唔到自己阿，下？」

阿超：「好「攞」阿你，（模仿）系咪控制唔到自己阿，下？哈哈。」

文浩：「哼，唔紧要，在下早已经习惯左。所谓「别人笑我太疯癫，我笑他人看不穿」，小小的挫折…」

阿超（仰身向前）：「得啦得啦，小小挫折等于激励㗎嘛，次次你都咁讲架啦。拿！最近，我听讲嗰个有关『遗忘』既电话服务的流言。你知唔知？」

文浩（捂住了嘴）：「我知阿！不过我就唔系几信啦，边有可能会咁就唔记得晒啲野阿？」

阿超：「真唔真唔紧要。我只系想画一本以『遗忘』作为主题的漫画！你就负责作故仔，我就画佢出黎。至于故事情节，我就有个谗法，你帮我 create 下啲情节啦——听住啦，（夸张）本来缺乏自信的宅男，爱上左同班既女神。用左『遗忘』既服务之后，忘记晒懒惰阿，自己既不足之处阿咁，同埋…面对女仔个阵既紧张同懦弱（模仿表情），终于鼓起勇气同佢告白！最后抱得美人归。咁当然啦！靚仔情敌、热血同伴个啲你都加几个落去啦。你话，咁样精唔精彩先？」

文浩（推眼镜，目光在晴晴跟阿超之间徘徊）：「其实听落都 OK 既，都几有吸引力。（认真）最好紧系加埋男女主角唔小心锡埋一齐，情敌间既打斗场面，男主角既热血宣言：爱你一万年个啲啦系嘛？」

阿超：「系阿系阿！」

文浩：（继续徘徊）「其实…你系咪映射紧你同晴晴呢？」

阿超：「你乱讲乜野阿？」

文浩（继续徘徊）：「你钟意晴晴既事，我知道得好清楚架喎——」

阿超（摇头摆手）：「唔系咁！我最憎呢啲以为自己生得又靚，身材又好，读书又叻，运动又劲，脾气又好，心地善良嘅女仔架啦…」

文浩：「你真系唔钟意佢？」

阿超：「无错阿！绝对唔钟意。」

文浩（站起）：「OK！咁我帮你同佢讲。」

阿超（站起阻止）：「喂！你唔好阿！」

V.O.：「好啦，王文浩同学，李超同学，有野倾就三个一齐倾！中六啦你地都，仲成个细蚊仔咁，郁啲就企起身，你系咪控制唔到自己阿，下？」

超，浩：「Sorry！」

阿超（耳语）：「唉，我系钟意佢。但系，我点配得起佢啫。你睇，我生得唔靚仔，人又唔高，又唔有钱，佢根本唔会睇上我呢啲只会空谈理想、一无是处嘅人。」

文浩（拍拍他的肩头）：「你讲得无错。正因为咁，我们先要完成呢部作品，唔系咩？我谗，只要比佢睇见你为梦想努力奋斗既样，明白到你啱呢个作品入面所倾注既感情，佢一定会比你感动，然后接受你架！」

阿超：「文浩……」

文浩（推眼镜）：「照我睇，只要你仲未比佢正式拒绝，就意味住你仲有好大机会。你即管放心，只要有我精心撰写的剧本，你生动有趣嘅画作，加上…你唔好表白住，咁佢就唔会拒绝你嘅！」

阿超（大力拍打他）：「你真系我嘅好兄弟啫！」

V.O.：「你地放学留低陪老师倾计！」

阿超、文浩：「对、对唔住……」

（灯灭，第三场终）

第四场、

(没有台词，两位主角以默剧形式展示设计故事、画画的过程。当中两人非常辛苦，非常疲惫，例如不断弃置废纸，不停讨论剧情等等。然而，两人全程都互相扶持。最后完成作品。)

(主角两人从右侧走进舞台，编辑则由另一方切入)

两人(鞠躬，阿超把手上的稿件递出):「编辑先生，请你睇下个故事先…」

(编辑 A 摇摇头，从两人身边走过)

(编辑 B 出场，两人再次走到他的跟前)

两人(鞠躬，阿超把手上的稿件递出):「编辑先生，个作品画得几生动…」

(编辑 B 摇摇手，拍拍他们，从两人身边走过)

(编辑 C 出场，两人再次走到他的跟前)

两人(鞠躬，阿超把手上的稿件递出):「编辑先生，呢部作品个题材好新鲜架…」

(编辑 C 用手赶他们走，从三人身边走过)

(编辑 C 走后，文浩生气地踱步)

阿超:「点解无人会赏识我地既作品? 我画嘅画，加埋你既剧本，明明系咁精彩、咁得意! 个啲垃圾编辑，根本唔愿意接受我地呢啲新人既作品，去死啦!」

文浩:「唔紧要，我地先十七岁，仲有大把机会㗎! 试多几次，一定搵到伯乐既。漫画咪讲左咯，主角屡次受挫，最终选择忘记失败既过去，尝试以自己的双手开拓未来——一个份勇气同觉悟，我地而家咪要展现㗎!」

阿超:「你咁有谗头就话者。你睇，而家我地都中六啦，下年考 DSE，毕业啦。你中文咁劲，勤力啲考上去大学读中文都得! 我读书又唔掂，剩系识画啲垃圾——咁落去，唔好话晴晴，我无将来架啦!」

文浩:「唉! 唔好放弃。你画嘅画系故事既身体，无左你画嘅画，我嘅剧本根本展现唔到——所以，你唔好绝望，因为我坚信看过呢部作品的人，都会感动!」

阿超:「…」

文浩：「记住，无论咩事都系一齐顶，一齐进，一齐退。咁啦，你画一幅我地既肖像画——呢幅画既名，就叫做『朋友』！到时我地望到佢就知呢个世界点都有人支持自己。」

阿超（移开了目光）：「得啦，你个正能量怪物，我今晚就画出黎。」

文浩：「嗯，我地一齐加油啦！」

（文浩伸出手，阿超却犹豫，尴尬地沉默了几秒，最后握着）

阿超（急步离去）：「我有啲事要做，你有咩打比我。」

文浩：「喔！」

（第四场完，灯暗）

第五场、

（灯亮，文浩站在舞台的中央，后方站着一排黑衣人）

文浩：「曾经，我有一个哥哥。佢大我三岁，但系一个好优秀的人，唔单止文武双全，仲赢到唔少女仔既欢心，系父母既掌上明珠。即使系咁，我都无同佢比较——因为，当我失落既时候，哥哥就会鼓励我，同我讲，总有一日，我都会搵到自己擅长既事。」

（数名黑衣人走出，站在文浩身旁）

群众演员(男)：「你睇下！」

群众演员(女)：「你睇下！」

群众演员(男)：「你睇下！」

群众演员(男)：「你阿哥系全港十大杰出学生阿，品学兼优阿！」

群众演员(女)：「你阿哥又系学生会会长啦！」

群众演员(男)：「你阿哥破左 100 米短跑纪录阿！」

群众演员(女)：「你阿哥系篮球队既三分神射手阿！」

群众演员(男)：「你阿哥又系全级第一啦，佢连续三年都系第一啦！」

群众演员(女)：「你阿哥…电话号码几号阿？」

群众演员（众女）：「你阿哥！好正阿！」

群众演员(女)：「但系你呢？」

群众演员(男)：「但系你呢？」

群众演员(女)：「但系你呢？」

群众演员(男)：「唔单止人头猪脑，又无特别既长处，真系正一废物！」

群众演员(女)：「你第几次攞零蛋阿？」

群众演员(男)：「我从未见过有人跑 100 米跑 1 分钟架…」

群众演员(女)：「我未见过有人可以破左做一次实验打碎 8 支 test tube 嘅纪录架。」

群众演员(男)：「佢系打碎左 9 支。」

群众演员(女)：「咁…1+1 等如几多阿？」

文浩（焦急）：「3! ……阿!!」

群众演员(众)：「唉!」

文浩母：「文浩，放低个件衫啦！佢系我特登奖比你阿哥架!」

文浩父：「文浩，你留喺屋企温书，我地同你阿哥去食饭庆祝。」

文浩兄：「唔好扔低文浩！唔好理佢地，你一定会搵到自己嘅才能架。阿哥支持你，无论咩事都系一齐顶，一齐进，一齐退。」

文浩：「阿哥！（哥慢慢退后）可惜，唯一锡我嘅哥哥，喺两年前——我十五岁的那年，因为意外去世左。当时，我个心穿左个大窿，无人再锡我，鼓励我，喺我无助中救我抱起我。但系喺伤心嘅同时，佢地竟然咁讲…」

文浩父：「唉，唉！唉！阴公啦，我地屋企唯一嘅希望就咁无左啦。」

文浩母：「呜呜呜…如果…如果死嘅系你就好啦!」

文浩：「由细到大，我就成日被攞黎同哥哥比较。对于父母，其他人嘅指责，我无言以对。没错，身为天才哥哥嘅弟弟，我令不少人有过高嘅期望，然而同样令佢地失望。有时候，我会咁谗——如果自己可以消失就好啦。所以我准备个日放学就去跳楼。」

（阿超跑出）

阿超：「喂！我偷偷地睇左你收埋嘅柜桶个份故事，真系好正阿！几时有下集者？拿！我就钟意画画嘅，不如我地合作啦。你叫咩名？」

文浩：「佢出现左。佢系我一生中唯一一个朋友。佢好特别，佢都同我一样无朋友，但系佢成日都好似阳光一样照亮我嘅生命。佢系一个识欣赏我嘅人，一个可以填左我个窿嘅人！如果无左李超，我早就失去灵魂。」

（第五场完，黑幕）

第六场

（灯亮，文浩跪在地上，面朝地下。由愤怒慢慢冷静，两手则拿着撕开了的肖像画。男人站在他的背后，默默站立。）

文浩（抬起头）：「好。如果佢嘅希望系咁，我愿意将我嘅记忆献出黎。」

男人：「你要谗清楚，一但消除嘅记忆系绝对无办法还原。而且呢个系你嘅决定，我无影响过你。你唔可以后悔。」

文浩：「绝对唔会！（苦笑）」

男人：「好！够爽快，黎啦！」

文浩（转过头）：「喺我离开之前，可唔可以拜托你一件事？」

男人：「请讲。」

文浩（举起被撕裂的画）：「你可唔可以将呢幅画粘番好吗？」

男人：「点解？你要知道，即使重新缝合，一度被破坏嘅事物，总会留下裂痕。」

文浩：「曾经有人讲过，『破坏比创造来得容易』。而家既我，就认为呢句话一定系错误嘅，就算系存在一部份正确，但都系错误架。」

男人：「喔，点解要咁讲呢？」

文浩：「破坏——这个词汇，意味住结束、消失、被扼杀。但系，被破坏的事物，总会留下残骸；即使，无左残骸，都会留下记忆；纵使，无埋记忆，都会留下思念；最后，虽然被世人所遗忘，但系过去存在过嘅事实，都永远唔会消失。」

文浩（望向天）：「所以，即使结局如何，都唔会改变曾经存在过嘅事实。」

（接着，男人接过画）

文浩（露出了疲惫的笑容，慢慢躺下，脸朝地面伏在地上）：「——有时候，逃避都系需要勇气啊。」

男人：「我会帮你忘记你想忘记嘅记忆，你只要聚精会神去想象，去记忆，佢地会好似啲空气咁慢慢由你脑袋飘走。」

文浩：「嗯。」

（男人轻轻按住文浩的头，文浩留下眼泪。灯渐暗，最后黑幕。）

（灯亮，台上只剩下文浩。阿超和群众演员冲进舞台，阿超看到倒在地上文浩，冲到文浩跟前。群众演员围住他们）

阿超（惊慌）：「文浩，发生咩事！？」

（简略地探查了文浩的呼吸与心跳，却发现眼前之人已经失去了气息）

阿超（绝望）：「文浩！（对周围）叫白车阿叫白车阿！有人跳楼，叫白车阿！」

（灯灭，第六场完）

第七场、

（场景回到序幕的墓地，男人慢慢把画粘好）

阿超（扯住男人的衣领）：「点解！点解你要玩弄人类的感情？」

男人：「呵呵，我无玩弄人类的感情啊。」

阿超：「文浩嘅死，你系唔系应该负上责任？」

男人：「责任？唔系，责任唔系我。我问你，你知唔知佢点解会跳楼？」

阿超：「点解？系因为你消除左佢嘅记忆阿！」

男人（摇头）：「错啦错啦！完全错啦！愚蠢嘅人。我问你，究竟佢选择消除乜野记忆阿？」

阿超：「我点会知道？」

男人：「咁对佢黎讲，乜野系最重要？」

阿超：「系乜野？佢屋企人？佢嘅小说？佢嘅天份？学业？钱？大学？荣誉？系乜野？系乜野阿！！？」

男人（手指天空）：「你根本就一啲都唔了解佢，你系时候要搵番你个段唔想面对嘅回忆…」

（灯暗，男人与阿超转换台位，坟墓搬走。表示他们进入阿超的记忆）

阿超：「你系真嘅？」

男人：「我系真嘅。」

阿超：「我系指你真系可以变走我嘅记忆？你系咩人？点解你会知道我住边度？你系巫师？哈利波特？定系…」

男人：「你会忘记我。」

阿超：「我可以忘记所有唔开心嘅野？」

男人（微笑）：「基本上，你想忘记乜野都可以。只要你去谗，你只要聚精会神去想象，去记忆，佢地会好似啲空气咁慢慢由你脑袋飘走。另外，我嘅存在都唔会喺你嘅脑袋留住。所有人只会知道我嘅联络号码，但系唔会记得我。咁…你想忘记啲乜野？」

阿超：「忘记…忘记…你点样证明你系真架？」

男人（看着手机短讯）：「你如果无野要忘记我就先离开啦。（收起手机，伸出手按住阿超头顶）不过你要先忘记我。」

阿超（急）：「等等！自卑。我想忘记自卑。我想忘记对…我朋友嘅自卑感。因为我受唔住啦。…」

男人：「Interesting…」

阿超（合上眼）：「黎啦，我想忘记。如果唔系我唔可以坦诚咁面对佢。」

男人：「咁如果我有方法令你嘅画画技术提升呢？」

阿超（退后）：「你点知我识画画架？你…你真系哈利波特？唔系…你似石内卜！」

男人（微笑）：「你想唔想提升画画嘅技术？」

阿超（盯着男人）：「点样提升？」

男人：「喔…好简单，等价交换。我只要洗走记忆，一个记忆，一个你朋友嘅记忆！」

阿超：「你想对佢做乜野？你个贱巫师，你想洗走佢嘅一啲宝贵回忆黎换你更强嘅法力之类嘅野？我先唔会比你利用。我剩系要变得有自信！」

男人（摇头）：「你谗下。只要佢一日有才华，你无论忘记几次你都系会自卑。但系如果你嘅画功可以同佢拍得住，你咪唔会自卑咯。你估佢都可以同一个好似你咁无才能嘅人成为永远嘅朋友咩？如果你系佢，出左名之后有机会同第二啲著名嘅漫画家合作，你估佢仲会唔会同你「并肩作战」阿？」

阿超：「……」

男人（在阿超的耳边低语）：「其实，而家嘅你，都好烦恼系咪？——究竟要唔要选择更好嘅前途。」

阿超（睁大了眼睛）：「点解你会知道？」

男人：「嗯，我知道。由你嘅表情上，我已经睇到你嘅答案。」

阿超：「系咩？我嘅答案……我应该点做先好？」

男人（把手按在阿超头上）：「用你嘅直觉，你嘅脑袋黎回复我…」

（灯暗，场景回到序幕的墓地，回到第七场一开始的台位）

阿超：「我……」

男人：「对于软弱嘅人类黎讲，真相太难接受。」

阿超（大声）：「你指文浩？」

男人（微笑）：「……」

阿超：「你实在太卑鄙啦！你系恶魔，引诱人类嘅恶魔！」

男人：「你唔好忘记，主动同我地做交易嘅，系你地两个。需要我，想忘记，都系你地。」

阿超：「……」

男人：「你先系最罪孽深重嘅人。」

阿超：「所以你要惩罚我？洗晒我嘅记忆？」

男人（温柔地走近阿超，轻轻搭着他的肩膀）：「无咁嘅必要。话你听，佢当时忘记嘅系…你阿。佢话…我要忘记阿超！」

阿超：「……」

（男人把粘好的画给予发呆的阿超，缓步离去）

阿超：「咁点解佢要跳楼？」

（第七场完，灯暗）

第八场(终场)、

(阿超一人坐在台中央拿着电话，另一手拿着两人的肖像画，灯光微弱)

V.O. (成熟男声):「你好，呢度是少年跳出版社。我地对你地嘅作品《失忆男神》好有兴趣，亦希望你地可以同我地商讨下有关的事情——咩话？你唔明我讲乜？简单黎讲，就系本社希望同阁下合作，出版你地嘅漫画！」

阿超:「真嘅？我可以出名？」

V.O.:「当然啦！我从未见过咁出色嘅故事同漫画架！话晒…我都系男神丫嘛。不过呢，记得带埋你朋友黎阿。你地两个咁好嘅配搭，可遇不可求！」

阿超:「如果…得我一个呢？」

V.O.:「你讲真架？得你一个？点解你个拍挡…？」

阿超(稍静片刻):「…嗯，佢死左。」

V.O.:「喔，真系抱歉。嗯…咁阿，真系好抱歉。嗯…嗯…我谗我迟下再搵你啦。(挂线)」

阿超(对着肖像画):「文浩？我地成功左啦！我地成功左啦！」

阿超(任由手中画掉在地上，指着它):「你睇，呢幅系我画嘅画。这幅画上面，系我地嘅青春，系无法磨灭的友情！哈哈哈哈哈哈」

(灯暗，全剧终)